

愚

齋

存

稿

愚齋存彙卷第六十一

電報三十八目錄

寄外務部

又

京外務部來電

寄京外務部

又

京外務部來電

寄北京顧康翁

又

愚齋存彙

卷六十一目錄

又

又

又

北京顧康民侍郎來電

外務部來電

北京顧康民侍郎來電

寄顧康翁

又

寄北京楊誠之星使

北京楊星使兆璽來電

外務部來電

又

寄外務部

寄美京梁震東星使

寄外務部

寄北京顧康翁

鄂督端午帥來電

顧康民侍郎來電

外務部來電

寄京張宮保

寄外務部

寄武昌端制台

又

武昌端制台來電

寄端制台

外務部來電

寄天津袁宮保太原張筱帥

江督魏午帥來電

寄魏午帥

寄武昌岑方伯春冀漢口陳關道樹屏

魏午帥來電

顧侍郎來電

外務部來電

寄外務部

顧侍郎來電

寄顧康翁

又

寄王中堂

顧侍郎來電

寄津袁宮保

寄武昌端制台

寄開封陳小石中丞

寄北京張宮保

寄外務部

汴撫陳小帥來電

外務部來電

寄濟南周玉帥

寄北京顧康翁

寄外務部

又

寄外務部商部

寄粵督岑雲帥

外務部來電

顧侍郎來電

袁宮保來電

寄江督魏午帥蘇撫恩藝帥

魏午帥來電

寄北京張宮保

外務部來電

寄晉撫張小帆中丞

北京張治秋尙書來電

袁宮保來電

寄外務部張宮保伍侍郎津袁宮保

寄外務部

北京沈藹滄京兆來電

寄外務部

愚齋存稟卷第六十一

電報三十八

寄外務部

光緒二十九年五月二十二日

箇電諒蒙鈞鑒頃據沙多面稟鄖城至漢口八百里鄖城至浦口一千二百里若准福公司另造鄖浦路則鄖以北貨客悉爲所奪因多走鐵路四百里少走長江千餘里彼必故減車價以相爭是盧路北不能達天津南又從鄖城半途截去在英國專心損害盧漢而中國何以償還比法本利各國鐵路斷無如此自害自之辦法即使中國不知自顧鄖城至周家口早已奏准歸盧漢

公司自造又何能出爾反爾等語又詢其鄖城接至津鎮利害若何據稱其害亦屬相同決不可允比法使請相離三百米達不准他人造路雖屬太過然持平公論鄖城終難應允宣懷職有專司恐轉詢盧漢還債無以應之非敢稍存固執哲美森在京面求澤道路改作借款聞福公司賣票甚難此節亦在堅求之列兩害取輕似不妨由大部允之以答英使之意

又五月二十三日

澤襄在漢口上游無礙盧漢鄖浦在漢口下游鄖由徐宿至鎮江較鄖至漢僅多三四百里鄖由正陽關至浦

口較鄖至漢僅多一二百里皆可少走江路兩日安得
不爲所奪況英造鄖浦則鄖至周家口枝路亦無所用
聞比法使照會大部已復竊恐一波甫平一波又起查
英已承造關內外路津鎮路滬甯路蘇杭甬路廣九路
浦信路澤道路不爲不厚今爲他人開礦另造鄖浦明
害盧漢而盧漢大功將成重債到期能否歸還實無把
握凡一國造路斷無不自顧之理中英交好有素何致
太不講理必不得已澤道准照正太與福公司核定通
融商辦鄖浦路將來中國如願興造先儘福公司商議
以明盧漢祇求自保利權以還洋債如果將來力能還

名六十一
債不妨再造鄺浦此義質之公正人當亦以爲平允再
據怡和云浦信已允福公司合造並非虛假

京外務部來電

五月二十六日

英使來晤仍持三端爭論當經答以澤道照正太
辦法尙可通融惟該路已經開工需款若干應由
盧漢總公司派員確估再與福公司定議其運腳
一節現在無從議及至鄺浦一路應俟盧漢路成
核計進款足敷償還本息彼時中國如願興造福
公司亦可備議等語川漢路本與浦口無涉如果
將來借款開造福公司亦與他國公司均在備議

之列已由本部另行備文聲明以破其抵償之計
能否就範均未可定至怡和向尊處云浦信已允
福公司合造並非虛假應卽索取憑據以資辨論
希電復

寄京外務部

閏五月初二日

壁利南函復稱長江以北各鐵路無論現在福公司已
得或日後所得及英公司已得或日後所得兩公司已
議定各籌款一半合辦其浦口至信陽一路亦如此辦
理等語英公司卽怡和也

又閏五月初四日

沙多接比使電哲美森向比使面商如允英造鄆浦路
英可允盧漢公司造保津路沙多接言保定展至天津
大於盧漢有益失長江下游之利而收之海口尙足相
抵等語惟兩處展路而聽其自辦固有流弊若添借款
而自奪自利亦非善策英使近日有無照復乞鈞示

京外務部來電

閏五月初八日

津保路上年因英比相爭議歸中國自造鄆浦路
允俟將來中國願意興造再與福公司商議該兩
路均應聽中國作主豈能由英比兩公司私相抵
換此事現可無庸置議至川漢路英使仍爭先儘

字樣並有可作罷之語經本部復以浦信川漢路
中國本擬自行造辦如將來資本不敷或需借用
外國款項先與美英兩國公司商議合辦希查照
寄北京顧康翁 閏五月二十五日

病愈已遵前 旨隨同會議面詢古納美國不欲干預
中國主權足佩交誼惟美約所無而英約所有者須無
阻礙古云各國喜我第四款則英約第八款已無用似
此名爲不干預實則爭勝英約欲於加稅外一無所有
卽如鹽務一節聽中國自便係專指產鹽銷鹽地方收
稅而言不准我設驗卡則沿途鹽局難立棉花一節發

還各稅而不提明出廠稅應收十分何以相抵土貨一
節本地銷售祇應報明常關則銷場稅局難以另設赫
德節略內云美國以始徵出產稅後徵銷場稅可任自
主不必列入各國約章惟一面如此說一面裁撤內地
常關是兩稅將從何徵收雖係內政不若於條約內提
及以免日後着手時他人指爲違約等語昨裴式楷交
節略尤以爲慮中國局勢稍涉兩歧恐又如賠款金銀
事難辨正秩庸覆校洋文明降 諭旨一節云內地各
項稅捐之關卡局所盡行裁除將英約除按此款所載
抽收外刪去似此種種語病若不改正流弊何窮然美

使已作爲定本奈何

又聞五月二十五日

昨爲鹽務辨正美使謂十六款呂伍均已議准告以政府有准者有已駁者有未復者必須候我政府全行核准方能會奏總之中美交最厚不必爲他人作嫁再三密勸彼始勉強應允而不願零星修改說明應改者一氣覆核覆議昨發公電請示但此次宣係後添若無部電未便發難應請大部逐款與英約核對不妥處速發公電飭卽修改如來電不提之事卽作爲已准關係非淺邸相各堂未敢單電請作爲兄意轉達

又閏五月二十五日

現將秩庸譯本與寄京電文核對文義不符甚多一面覆校字面錯者自改意義錯者尙費唇舌照會附件尤須妥酌彼欲於忙中討便宜似難俯就致貽後悔

又閏五月二十六日

三徑電因美使亦允一氣修改故將管見密陳但欲尊處洞悉實情幸勿宣布有電極嚴切須候應修各款齊集一總辯正鹽土銷場稅等局既不入約附件照會斷難含渾約中背礙字義尤須改汰淨盡不可與照會相歧請部電總括嚴重庶可着力補救加稅免釐創自鄙

論尤深惴惴專利一款甚礙工藝現將伍譯全稿覆對
卽備函送

又 閏五月二十六日

秩庸校改底本二十六先寄尊處公函正本兩三日亦
寄如先發電須云候全文到再須覆核銷場稅全仗照
會而美使復文有與彼訓條不符語但允不礙主權似
未妥且不願作附件查復文未電寄現欲商改極難來
電請詢及

北京顧康民侍郎來電

閏五月二十七日

四電均悉現逐款覆核候邸樞酌定約三四日內

電達昨康使見邸辯論口岸事已繕給節略俟我兵撤後自開康已允諾因言此事既定商約即可畫押告以本部尙須逐款覆核康謂各款已經商約大臣議定未便再改告以字義有未顯明之處不能不詳細聲敘並非全改辦法康云可商又英約已用寶月初互換并聞

外務部來電

六月初一日兼致伍大臣

伍大臣來電悉張京卿條陳商務事宜十二條遵旨妥議各條中有可照行者有宜變通者有須逐漸擴充者有空礙難行者如原奏第一條農工

路礦宜招商承辦一節准如所議設立農務工藝
鐵路礦務各公司隸於商部廣集商股次第開辦
第二條招商興墾山利一節議由商部設立公司
先在直隸試辦第三條興墾山利種栽一節議由
公司辨別各省土性所宜廣行種栽一俟奉天吉
林交回後分設公司先就兩省試辦第四條興墾
山利礦務一節議歸礦務公司切實興辦至一切
礦章立案應遵上年七月初九日 諭旨俟議定
章程再行載入商律第五條招商興墾水利第六
條已墾未墾均宜籌辦水利各一節亦均議設立

公司先在直隸試辦第七條招商設立貨耕公司
一節恐啟奸商壟斷重利盤剝之弊議駁第八條
招商興辦工藝僱募工役一節議設工藝公司於
京師先行招商開辦第九條招商興辦鐵軌支路
一節議設鐵路公司承辦第十條招徠外洋華商
一節議將註冊保護及控訴等事統歸商部及商
務大臣辦理第十一條權度量衡圖法宜歸畫一
一節請由整頓圖法王大臣妥議餘俟商部設立
後酌中定議奏明辦理第十二條請設商部員額
及各省商債一節除商部各員及公司名目應俟

簡派商部大臣再行酌核外省設官官多權
分轉嫌窒礙議駁總之商之本在工工之本在農
故商部必兼轄農務工藝鐵路礦務各公司以爲
振興商務權輿擬卽先請揀派大員開辦商部庶
應辦諸事可以次第舉行至商律擬俟商部設立
後督飭部員隨事考察一二年後再行編訂庶無
扞格難行之弊鄙意如此尊處美約事畢務希迅
速來京以便面商具奏卽電復

北京顧康民侍郎來電

六月初一日

本日已發公電想達覽惟徑一電云土貨祇報明

常關則銷場稅度難設赫德節略謂裁內地常關
銷場出產兩稅從何征收等語查報明常關英約
亦有此語銷場稅是否歸常關徵收英約無明文
何以裁關卽兩稅無從征此意未能明希再指示
內地各項稅捐之關卡局所一句查前月陽電所
述改定約文內地下有洋貨二字似無語病如洋
文不符可令改正

寄顧康翁

六月初二日

南洋轉戶部咨商銷場稅事宣昨到蘇與朱竹石面商
辦法內地旣撤常關擬在各城鎮設銷場稅局常用土

貨本省銷者定值百抽二五卽產地稅也出省再抽二五卽落地稅也同在一局抽收如過洋關加復進口二五過常關亦加抽二五共收七五奢侈品分別加重惟出口土貨能否先收產地二五尙待英國商允鄙見須調東南各省釐局老手會商畫一章程方可放心

又 六月初二日

銷場稅卽在常關抽收是赫德誤會惟英約祇應報明常關之下有以便征抽銷場稅句故通商口岸行銷土貨亦抽銷場稅此力爭而得者美約不說明初以爲慮今核對有照政府稅項章程辦理句好在口岸尙有常

關只要英文對准可無過慮關卡局所盡行裁除之上
有內地洋貨各項六字鄙見必欲去各項二字方能專
指洋貨

寄北京楊誠之星使

六月初八日

現因庫款支絀不能應期劃撥鐵路總公司一千九百
一年所給部款票據七百萬佛郎克以備路工之用請
卽轉告比公司錫卓格來部款之票須展緩仍暫存比
公司至此票之款將來如何撥付擬俟冬間赴京與外
務部商明電達

北京楊星使兆鑒來電

六月二十二日

票展緩須換新據書付款定期乞酌復

外務部來電

六月二十二日

美使稱接粵漢鐵路總工程司革雷函盛宮保囑
駐美大臣不按照合同在粵漢鐵路保票簽字請
囑將阻止簽字之意撤去並將此保票交於粵漢
鐵路公司等因查粵漢鐵路小票餘利憑票按照
合同應由駐美大臣簽押蓋印尊處因何阻止希
卽電復

又 六月二十三日

英使稱澤州至道口鐵路已允照正太鐵路章程

辦理現哲美森擬赴滬與盛大臣將詳細合同商
明請電達會商等因查澤道一路准照正太鐵路
章程辦理已於五月宥電詳達茲哲赴滬商訂詳
細合同希與妥商並將商議情形隨時電達

寄外務部

六月二十三日

粵漢鐵路原因美公司代理人革雷辦事不合格違背
合同故電梁使停簽小票開辦之始不遵合同萬不能
交票停簽數日後適接梁使函云簽票紛繁七月方可
成事當以簽票既需時日若停簽日多恐爭案早結反
無票可交因電梁使請仍簽免延但須候信再交付嗣

革雷疊來剖辯幸美公司派董維德阿來滬稽查革雷
在公司辦事各情此間與革雷原爭二節一應切實遵
照合同二革雷既爲代理人不應兼充總工程司且革
雷於工程司向不諳練工程均未呈估單在滬新開報
館種種不合當將各情詳告維董維已查確允照二節
函致敝處爲憑並電致紐約美公司總董柏森士亦卽
函致梁使查照宜已電梁使接柏函後仍照簽交此次
所爭係應有之義關係四千萬金元之鉅必如此慎重
辦理俾美公司始可切實遵照合同餘詳另函

寄美京梁震東星使

六月二十三日

維德阿已實在答應一美公司將來切實遵守合同二
代理人及總工程司之職必定分開請詢柏森士答應
否如願答應請將小票仍續簽字交付受託公司

寄外務部

六月二十八日

漾電飭照正太鐵路章程與哲美森商訂澤道合同該
處難在工程已將過半不易考核探聞福公司係包與
大成公司英商莫韃廉代造屆時擬令呈出原帳庶可
稍有把握俟哲到妥商隨時請示辦理

寄北京顧康翁

六月二十八日

宣勸美使製造專利美所得無幾何必定要古云本不

足重惟早經簽允稟報本國未便翻案看公面上酌改
緩辦則可查驗鹽務及銷場稅照復甚難餘可照改國
幣伍力主不應索其補平日本全約是否南皮在京卽
可全了

鄂督端午帥來電

六月二十九日

函悉竹山銅礦擬由公司開採請飭示禁私立合
同誠足以保利權惟前據法領事照稱法商嘉三
黎勘有竹山州柯樹鄧家台馬家口礦山三處請
十箇月內勿與他人開辦又據竹山縣稟舉人汪
炳宸等請開債購之鄧家台礦山各等情當因山

名相同顯有轆轤札飭嚴禁勿與洋商私立合同
並飭汪炳宸等不得遽開一面委員前往查明稟
辦祇以尊處上年委勘未准咨明有案故照覆法
領事文內無從敘入好在執事已函致各領事將
來不難理論清楚至私立合同久已飭禁似可無
庸電飭應俟委員查明稟覆再行電商酌辦嗣後
尊處如有委勘鄂礦之事必須先行咨商由鄙處
查復後再行往勘至要

顧康民侍郎來電

六月二十九日

美約意在將沿途局卡一切掃除乾淨惟鹽土二

項英約辦法定自香帥如不照改香帥必不允全
約定議無期但於附件內切實聲明不礙他項行
貨於美亦何所損至銷場等稅不過欲於照會請
添敘一句以期明顯並非礙難允從之事可將此
意婉告古使日約香帥在京僅議定加稅運米北
京開埠三款餘仍須由滬續議

外務部來電

七月初二日

汴洛鐵路合同第二十三款應添倘中國國家自
行籌款或招集華商股本接展此路比國公司不
得爭執等語行車合同應添郵政辦法三端一來

往此路均應備專車爲中國郵局寄送各郵件二
沿途不得由承辦之國自設郵局三沿途各棧皆
須備給房屋以便隨處添設中國郵局其餘各款
均可照准

寄京張宮保

七月初二日

前門外購地事沙多因兩路歧視頗不平欲請比法使
向外務部理論宣力阻之前函懇京兆無復諒有爲難
已派柯道到京會同孫道設法調處頃據電復已向各
御史磋商略有頭緒但須從緩請電達鈞處先行覆奏
祇剖假公濟私一節購地事參以活筆將來較易轉圜

等語此事由於鄭道操之太蹙現已撤調可對得起原
參之人看來購地事緩則圓但覆奏未便過遲可否卽
照該道所擬先請鈞處主稿奏覆乞示

寄外務部

七月初五日

冬電正太鐵路既據該工程司勘明應用窄軌飭再妥
酌切實電復以便請 旨等因查路軌本以一律爲正
辦歐洲遇有地勢曲折或限於財力亦有改寬爲窄者
璞科第初請正太宜用窄軌宜力與駁論必須遵照合
同由工程司測勘路線呈送圖樣方能核准彼已應允
現據總工程司埃西巴尼呈送路線圖彙係該銀行前

派之工程司測勘所繪宣詳細披閱分圖四冊山路崎嶇與盧漢粵漢大不相同其圖因擬用窄軌開鑿工費已屬不貲若欲加寬雖不至如其節略所稱須用款一萬二千萬佛郎克之多然必曠時糜費將來入不敷出誠屬可慮又閱其總圖係屬向北沿河新闢之路煤鐵諸礦均在左近詢其何以舍驛路不用據稱前工程司亦曾測勘因北天門西天門等處更難施工復詢山西派來委員潘禮彥劉寶森所言相符護撫吳廷斌函稱固關一路山河叢雜險峻尤多不若娘子關山河稍少路亦徑捷而留此固關數天門之險尙堪鞏固晉疆卽

商民往來故道如常輿情亦均稱便等語宜查娘子關
係已測之路圖樣既難容寬軌本擬飭令再勘固關一
路惟因險峻尤甚詢謀僉同就令再勘亦必無濟欲留
此故道以便輿情揆時度勢未敢再執成見致使 國
家虛糜鉅款至將來入陝一路或由洛陽接展亦未可
定除已派員帶領總工程司呈送路圖說帖請示飭遵
外是否有當應請大部迅賜核奏請 旨施行

寄武昌端制台

七月十五日

竹山鄧家台銅礦前經敝處派員紳帶同山主勘採礦
樣回滬並據鄧家台山主鄧姓呈出地數畝歸公司開

辦業已給賞并由縣出示封禁不許他人私開縣中有
案做處勘辦在先法領事照會如在今年是已在後應
請先行駁覆做處仍飭查明確究係何人勾串再與領
事理論私立合同承尊處久已飭禁感佩無似以後如
勘鄂礦自當咨明仍請尊處派員會同做處員紳前往
免生枝節餘詳函達

又七月十五日

頃禮和洋行德商連納面稱竹山銅礦可否請與該行
合辦詢其何因據稱法商亨達利前以湖北湖南四川
貴州無數礦山抵借匯豐鉅款亨達利洋人死後匯豐

將欲拍賣禮和議定頂替竹山銅礦亦在其內今聞端
制台云本可卽准洋人開辦因盛大臣有咨曾故須商
酌特來請示並稱德礦師已在漢口或聽德礦師往勘
或聽我派礦師同勘等語似此情形中國若再不自行
收買礦地將盡爲外人所得恐地利地權盡失矣竹山
銅礦極佳惟有請尊處據弟咨速飭地方官禁止勘挖
一面由敝處卽派都司周獻琛等帶同頭等礦師往勘
並請尊處速派幹員同往去員職名乞電示遲則德礦
師先往更難措手

武昌端制台來電

七月十七日

竹山礦現已飭禁未接大函前因法領事照會有
鄧家台一處與竹山羅令稟汪炳宸請辦之地相
同曾委員往查而法指之地又有與禮和同者昨
德領事請派員同礦師往勘已飭關道照會將竹
山應俟尊處商辦南漳另有糾葛剔除祇房保兩
境五處委員同往監察免其中途別往另生枝節
並不購地立約勘畢仍照章候部准駁再辦禮和
邀尊處同勘如何回復及周都司勘後如何擬奏
各辦法統望詳錄章程見示

寄端制台

七月十九日

竹山礦已飭關道照會德領事由做處商辦並已飭禁
深爲感佩周都司偕布礦師准二十三起程先勘竹山
宜佔先著未便同勘現值各洋商執契紛爭尤要在佔
定產礦地段不爲所奪方能會同尊處籌款議章奏明
開辦周係緡譯應請台端派定一員俟周到稟謁卽請
飭令鄂員同往勘地採樣愈速愈妙餘詳篠函

外務部來電

七月十九日

本日奏正太路用窄軌一摺奉 硃批依議欽此
查此事前以擬用寬軌復勘需時璞科第向尊處
商允展限一年今旣准用窄軌儘可提早開辦希

與該總辦妥議電復餘咨達

寄天津袁宮保太原張筱帥

七月二十日

風聞正太一路現有洋人教堂欲購鐵路必經之地以爲奇貨從前漢口鐵路基地先被洋人串通華人私購路局喫虧受累甚鉅務乞台端迅速札飭沿途各州縣凡有洋人及教堂欲購鐵路所經之地必須商明路局方可准購除另咨外先此懇瀆

江督魏午帥來電

七月二十五日

金陵洋務局亟須儲備通才辦理交涉事宜公洞悉中外見聞較廣衡鑒自真乞爲物色一二見告

又張大令美翊舊爲尊處記室倣署洋務一席現
正需人代庖交涉一切是否爲其所長幸希速復

寄魏午帥

七月二十六日

有電具仰虛衷尊處洋務必須得人貴幕中施理卿久
司南洋交涉遇有艱鉅識見高超條理精密間有格於
時勢無力辦到之處亦能高處落墨仍就平處了事劉
忠誠倚賴甚殷其清操傲骨惟至誠可以感之藩司黃
花農隨李文忠有年洋務頗有歷練若令總理洋務局
交涉案件由其擬呈辦法各口岸領事等謁見時派其
與議必能輕重得宜臨機決斷滬道袁海觀於還鎔挖

河兩事堅持爭執確有見地此次封館拏人雖未滿人意亦尙力爲其難但能多留一二年滬事公可無憂張令美翊長於書札近頗留意教育現辦南洋公學士子守法不爲外誘是其長處至洋務案牘並未辦過通才難得彼此同慨茲有開缺福建臬司楊文鼎在閩管理洋務局庚子年全省無教案賠款皆楊之力前在北洋幕中最久李相王相榮相均甚賞識昨項城招之由弟暫留在滬此人現雖抱屈將來必復起用公若欲延攬奏派洋務局會辦兼司摺奏必可得力公若不用擬奏令隨辦商約矣弟愧無知人之明但承推誠下詢敢舉

所知以備任使乞密察

寄武昌岑方伯春冀漢口陳關道樹屏

八月初一日

竹山採取銅礦極佳因德法洋商意在爭佔只得速派
總公司礦師布盧特馳往覆勘迅將應用民地購定免
落後著尤恐洋商慫恿公使出頭干預已函請外務部
堅持駁阻現在礦師已抵鄂請即回明兼院添派本省
委員會同譯員周獻琛等尅日由宜昌赴竹以速爲貴
所慮漢口洋人得知此信將以游歷爲名先往購地轉
致棘手

魏午帥來電

八月初一日

宵電敬悉甚感愛我之厚前治秋尙書爲致殷勤
信不誣也施君之才誠如尊論現有葬事暫離尙
須繫維到館惟天下事非一手足之烈常以乏才
爲憂亟思儲備一二繼起分任黃方伯總理洋務
局弟久有此意當卽奏派楊廉訪暫辦商約同受
其益俟此間局務設定再謀借重何如

顧侍郎來電

八月十三日

礦路專用華款應歸商部主政關涉洋款應歸外
部主政大致如此未見明文

外務部來電

八月十三日

奧齊使來署面稱中國通商銀行奧國願意入股
從前與盛大臣商定後又不允等語有無其事希
電復

寄外務部

八月十四日

法領事先來面商請將通商銀行歸併法國銀行合辦
告以中國商務極大近來各國到此添設銀行不少中
國是主人僅一通商銀行論面子亦斷不能少前因議
開 國家銀行華商擬請移通商銀行資本改辦他事
嗣以改鑄國幣雖有 國家銀行亦全賴商家銀行上
承下注方能使新幣推行無阻是以通商銀行更關緊

要勢難與外國銀行合併辦理法國去後與領事又來商歸併奧國卽告以不能歸併緣由旣已回復法國更難允許奧國並無從前商定之事其意亦非願意入股也

顧侍郎來電

八月十五日

口約全由香帥商定十一日始送部覆核未配送英文祇可由尊處趕譯或照香帥之意先簽漢文以免誤期代押出自內出所請如必不可行應由尊處與日美使另商兩全之法部必照允爲期甚迫連卽請 旨爲要

寄顧康翁

八月十五日

日約第一款慰帥請核改所慮頗確幾分兩字尤礙加稅一倍半之數蓋加倍已足抵釐香帥來電不願刪去上當匪淺以後各國恐難再持十二五之議昨電已請由京就近請旨矣部元電派呂等畫押專指美約而日約須俟另旨方能畫押日使已迭催

又

八月十七日

小田切云抵釐幾分卽是不到十二分憑據迭請香帥去兩字迄不復日使又欲刪去第五款要緊語呂大臣意請奏緩畫押如候至明早無信亦不及繕畫乞速籌

復

寄王中堂

八月十七日

日約不詳加稅十二五乃言只抵裁釐所細之幾分英
美所定十二五勢必因此翻異每年千萬殊堪痛惜三
次公電請香帥刪去幾分兩字又日使請刪第五款要
緊語皆未接復致難繕約呂意請奏緩畫押若候至明
早再無復電恐不及畫此事又難免開罪南皮

顧侍郎來電

八月十七日

幾分二字確有暗病今早已回邸堂由部加函請
香帥切商內田刪此二字

寄京袁宮保

八月十九日

尊處電奏竟不及進十年萬萬得失關乎國運非人力所能爲

寄武昌端制台

八月十九日

黃道請派宜勇十六名公又添撥鄭勇四十名黃道同行須令不離礦師當可無慮蓋籌至密欽感莫名鄧家台必有校節袁在滬將地租賣與洋行訂有合同其狡滑一望而知祇因採送銅樣非常之好乃不憚煩與外人爭然非公督鄂亦不敢託已電黃道等如礦師看得何處脈旺卽將該地迅速購妥立定界石以杜洋行爭

買竹山勘完便赴夔州清帥已派員在夔接護其恩施
興山等縣遵照緩勘凡勘礦不過百中選一蓋得一佳
礦利及百年猶憶從前請一英礦師兩年遍看數百礦
只得一大冶鐵礦也美日約已畫押卽鈔寄

寄開封陳小石中丞

八月二十三川

前接外務部來電澤州至道口鐵路已允照正太鐵路
辦法暫美森赴滬商訂詳細合同希與妥商隨時電達
等因現在該總董暫美森來滬會議所遞節略係出售
小票 國家擔保道口清化已成之路作價收回上至
澤州由總公司築造與盧漢一氣銜接等語查此事外

務部已允英使所請勢難中止惟已成之路究有若干里工程是否堅實哲一面詞斷難憑信應懇台端迅賜電飭韓道兼程來滬會同籌訂以資折服感盼實深並祈電復

寄北京張宮保

八月二十四日

寄電於參末議者獨加訶責既悚且感尙憶前年阻止俄約文忠師亦偏責宣一人親之至也籌國宜盡愚誠但愧於事無濟耳

寄外務部

八月二十五日

篠電敬悉前有山東知縣李祖范來滬招集商股擬運

東鹽赴海參歲哈爾濱銷售卽與李家鏊面商據稱海參歲向北一帶漁商銷鹽甚廣向係日本商人運銷能否購用東鹽尙無把握竊念魚鹽所產無窮能多一出口貨官民皆有益正擬切實商辦接海參歲來信東鹽蘆鹽均有商人運往已經積壓滯銷當飭李家鏊同歲查明銷路能否推廣漁商銷場及鐵路四旁戶口食鹽約數並查明直東鹽能否設法與日鹽爭銷稟復到日再行咨商酌辦

汴撫陳小帥來電

八月二十六日

頃在武涉工次接漾電敬悉福公司請發礦界憑

單韓道正與磋商事極輻輳應責成一手經理未
便遽令赴滬道口至修武縣屬大王鎮已成之路
七十五英里甫經行車工程由英商大成公司包
造韓道但司照料並未經手請公派熟諳路工之
員來豫查勘較爲核實

外務部來電

八月二十七日

比使前請派員赴萬國鐵路公會業於六月二十
日咨達在案茲姚使面稱能派沙多赴會尤爲有
益當告以沙多經理路工恐不克前往姚云但令
出名另派赴會之人亦無不可等語卽希酌核電

復

寄濟南周玉帥

八月二十九日

義振弟墊三萬同人又墊三萬今日已面交佑之庫平
五萬另匯尊處一萬候振聲到請轉交弟與鏡字尙書
仲懌侍郎公刻募啟或有所集自當隨收隨解以後均
當匯至尊處分撥遵辦新棉衣五千件卽札交東海關
或留煙台散放極貧災民以省運費或運利津數少似
宜專發海濱山東奏准加捐常例七項聞有預發空白
部照祈速咨送數百張此捐如須另解工用統候電示
寄北京顧康翁

九月初一日

俄事議久不決如三省不還德於山東鐵路已成恐先
效尤他國亦各有線界近日怡和接美電請將滬甯鐵
路改歸該洋商包辦是欲暗中全攬路權刻已切實駁
拒如英使來言務望大部持定合同責成敝處全力拒
之此間確聞日本現與駐日俄使合議東事如強鄰互
訂密約於我必不利至俄日傳言開戰斷無其事蓋人
情樂爲其易不爲其難也便中乞爲邸相各堂密陳

寄外務部

九月初三日

姚使請派沙多赴萬國鐵路公會宣慮他國承辦他路
者亦請派人據沙多云照例不妨多派但必須有華員

方合總公司擬即派洋員沙多華員柯道鴻年一面呈復

又九月初五日

哲美森會議澤道路事哲請 國家擔保借款一百五十萬鎊歸併總公司辦理並云大部已允悉照正太條款無可加減英使僅令來滬訂約簽字而已惟查福公司造路從前只言運礦現聞意在設廠煉鐵於中國鐵政影響甚大必須設法補救否則中國認借鉅款代造運礦之路轉使其騰出路款速成煤鐵礦以奪我鐵廠權利晉豫公司原合同條款內並無准其內地設廠字

義惟合同題目有製鐵二字殊屬含混自應趁此議借款之時與彼訂明只准開礦不准設廠倘不能禁阻亦必須限定路成開車之後至少緩辦鐵廠十五年內地利源方不致爲外人吸盡昨派員與哲熟商乃哲不謂然並謂卽電英使請王爺命令只訂借款合同不能議及他事謹先電陳如英使來言務請大部堅持告以前與總公司商辦祇屬大概斷無貸鉅款幫成路工轉使中國鐵路受重累之理且正太路亦無開鐵廠事此係商務並非交涉請令仍向總公司和衷會議以保中國自有之利權至禱

寄外務部商部

九月初六日

訪悉福公司初得晉豫公司合同集股極少事成股價
飛漲數十倍末後添股百萬鎊至今未能招足因其路
本不敷致難開礦以是派哲美森力謀鐵路借款實有
迫不及待之勢竊思晉豫合同平空給以無數礦利已
大失算茲因其求我國家出子澤道鐵路借票援照
正太辦法告其正太非爲俄法運礦而設今澤道專爲
英國運礦而辦索我借票俾騰出福公司資本全力開
礦是中國國家任代造運礦路之鉅款英國公司獨
受開礦無窮之大利彼旣欲因礦而及路我卽欲因路

而及礦一曰此路運礦車價須比他項客貨酌加兩倍
以備修養及票債本利一曰國家應得紅股若干分
沾礦利一曰只准開礦不准製鐵以符條約始終未准
洋商在內地設廠之義查馬凱議商約於內地製造爭
之甚力宣秉承部示堅拒得免今哲已明言運料製鐵
何能從此開端不僅奪鄂廠鐵利也自應堅執條約內
外合拒以絕其萌晉豫開礦合同非國家之合同況
條款內並無設爐廠煉冶之語其合同題首雖有製鐵
二字當時晉豫被其朦混彼若持此二字相爭擬准其
運鐵至通商口岸設廠鎔煉以符約章比較立年限理

似足晉鐵雖佳加以運費華廠尙可竭力抵制鄙意如此乞鈞裁電示以便再與會議

寄粵督岑雲帥

九月十一日

奉支電擬調陳錦濤辦理學務頃自先塋回檢查該生稟報本年已進耶兒大學校來年六月當可考得博士從前派出學生百餘名從未有一人畢業考得博士者瓜不待熟而生摘殊屬可惜敝學堂立法必欲期滿考得畢業文憑所以杜學生躁進之心免淺嘗輒止之誚不徒爲虛糜經費也台端開物成務培養人才諒不以弟言爲謬況陳錦濤爲派充美國肄業生之領班尤未

便先行調回乞原諒

外務部來電

九月十一日

澤道鐵路既爲擔保鉅款自應預籌償還本息之
需酌加運腳分取紅股兩層如能辦到藉資抵補
製鐵一節照約只准在通商口岸設廠若在內地
製造斷難照允希統與哲美森妥議英使若來提
及自當堅持

顧侍郎來電

九月十六日

俄兵復回瀋陽特召袁張畫策無甚舉動~~等~~願調
處而不願用力日尙相持阿提有調回之說大局

不至決裂但全撤終難決定耳穆赴長江無所聞

袁宮保來電

九月十七日

日約奏進約本請仍照敝處咸電將鄙人名列第二三不妨小有參差俄兵三營入奉省據城門佔衙署守電局係初九日事並索撤袁道大化誅營員王恩晉其來意似故作刁難並無大舉鄙人昨日回津商議略定

寄江督魏午帥蘇撫恩藝帥

九月二十三日

滬甯總工程司繪呈路線圖係由上海車站接軌以至崑山潘道面稟尊意擬就吳淞接軌藉興商埠自應飭

令復勘太倉崑山一路以備比較總公司路圖大致就
道路遠近施工難易商貨多寡折中核定而尤以估計
工費不越全路借款爲斷默揣淞埠未卽興盛由於軌
道太短嗣後逐段銜接通入內地海內岸自漸繁盛似
不在接軌之遠近也除俟復勘圖到咨請查核外祈先
核復爲荷

魏午帥來電

九月二十四日

路線承飭令復勘以備比較差率鄙意如比較差
率不遠宜仍就吳淞接軌於商埠大有裨益已飭
潘道就近稟商祈裁察

愚齋存彙

卷六十一

電報三十八

元

思補樓藏版

寄北京張宮保

九月二十五日

聞日本外部已與俄使開議六次現因日皇閱操暫時
停議日本煤價甚平減萬無戰事究竟美國能否調停
外間謠言甚多事關係歐亞全局幸值公在京想必有
善法處之不勝杞憂宣月初奉先靈回原籍安葬事畢
擬赴鄂屆時當可面商一切昨有詳函到日乞賜電復
外務部來電

九月二十六日

英使照稱澤道鐵路既經政府允照正太合同辦
理而盛大臣故意耽延掣肘所派四華員議令福
公司報効股票十五萬鎊又訂明若干年限不得

出鐵並未議及草合同應請將此事在京商辦等
因除由本部照復英使仍應在滬商辦外希速設
法與哲妥商隨時電部餘詳咨

寄晉撫張小帆中丞

九月二十七日

聞王道存善言公在滬曾云至晉必振興礦務公忠欽
佩晉礦自福公司訂合同三晉礦權全歸英握福因運
礦造路工甫及半外務部電飭歸併中國總公司彼意
在省造路款爲開礦之需其謀晉煤鐵礦利甚貪且亟
弟派陳道王道等磋商原爲緩福開辦之期可待公施
設振興之策地爲我地權須我操權授他人利自歸彼

鄰厚君薄其理顯然宣爲中國大局計不僅爲晉與公
也欲毀合同斷難辦到設法阻止似尙可行務請迅設
勘礦買地公司先將產鐵處所趕緊收買免爲彼所先
佔福公司合同內雖無製鐵字樣而原文題目有之彼
必欲在內地設廠鑄鍊此則關係香帥手創之鐵廠甚
重已電外務部請堅持部允力阻祈合力阻止此與條
約不合尤易措詞請電復至盼

北京張治秋尙書來電

九月二十七日

俄事無辦法張袁均請靜鎮樞意同餘有確音再
告

袁宮保來電

九月二十七日並致外務部張香帥
呂伍大臣

接藩函稱駐營口美領事曾抵瀋查看商務情形
美員甫去俄兵踵至俄人詞意甚以我允開埠爲
憾等語查日美約雖經畫押尙未批准日美旣無
辦法商約正本宜緩奏進祈酌裁

寄外務部張宮保伍侍郎津袁宮保

九月二十八日

慰帥沁電悉日美約已派楊道齋京會摺先送慰帥香
帥秩翁閱定再遞計日可到津京惟條約旣經奉 旨
畫押兩國勢必批准且歐美皆已傳播我雖緩奏恐難
久延東省開埠美使曾云俄已先允似可派人再詢康

格此事頗有關係應請大部與慰帥香帥秩翁就近商奪面諭楊道遵照

寄外務部

九月二十八日

哲美生輒以英使向大部商辦爲要挾計自論內地未便製鐵之後哲未來議但有函稱鐵路已築至大王鎮擬續造十七英里至清化爲止請電豫撫轉飭韓道應用地畝着力幫助等語當卽函復以總公司未便越俎如將來持平商定改爲官路屆時方可由總公司經理其事云福公司急欲售路必須趁此將內地不准設製鐵廠訂入合同以資補救所謂彼因礦及路我則因路

及礦也酌加運腳分取紅股兩層亦當竭力磋商至鐵路已造者估價較難其未造者照正太合同不甚費力現仍照給訓條派令參贊繙譯四員候哲來先與商議俟宣營葬事畢到滬再與面商在我不宜匆忙也

北京沈藹滄京兆來電

九月三十日

舍弟事感謝俄氛急朝議靜待日本協約袁張局內局外意見頗歧蔣侍御許樞臣上怒邸堂謝客

袁宮保來電

九月三十日並致外務部張宮保呂臣

約本奏進勢難批駁俄聞批准憤怒又加寇已深

矣詎堪再激愚謂宜緩奏數日待俄事稍有眉目
再奏未晚美人言不足信決不助我四五月間凱
已再四言之請兩星使勿復望美

寄外務部

九月三十日

前咨浙商李厚祐等請辦杭州拱辰橋至江干鐵路尙
未奉覆現有同知沈文孫等具稟借日本洋款一半照
甯滬幹路章程請辦此路浙撫咨商敝處日本領事頗
來饒舌但沈稟須借洋款五十年則此路必歸日本執
權與李厚祐所請全屬華股者不同查此案尙須俟怡
和杭甬路勘定有無牽制方能核定日使如赴部詢及

乞將部意電示

愚齋存藁

卷六十一

僊南三子

三

思利水一號月

愚齋存藁卷第六十一